

Però gh'è 'na cösa che no capiscio: comme mai e tasce vegnan faete pagâ a niatri, pövei despiaè, e nisciun se da da fâ pe scheuve i 98 miliardi (!) de eoro che i gestoî de *slot-machine* devan òu Stato segóndo quante a l'â acertòu a Goardia de Finansa. Mi confio che vosciâ, into sò rôllo istituzionale, sciâ pösse pigiâ quarche iniçiatiua pe domandâ raxon de questo monte de dinæ ch'o no vegne pagòu e do quæ no se ne parla goæi. De questi tenpi o saieiva in gran rescio!

Parlemmo òua de l'inmagine da nòstra Zêna perché in Italia se parla de Zêna solo quande quarcösa a va mâ. Son za intervegnûo dixendo che o mâ ch'ò bagna a Liguria (e ch'ò l'ariva scinn-a a l'izoza d'Elba) o se ciamma Ligure e no Tirreno; e chi fòscia quarcösa s'é mesciòu grazie a l'amiraglio Angrisano. A-o mæximo mòddo se porieiva aregordâ e tante cöse che van ben: tanto pe dîne unn-a, o Galata, o museo do mâ, o fonçionn-a che l'é 'n piaxe. E pròpio quarche giorno fà ò saciùo che a statoa do De Ferrari a vegniâ torna rimissa a-o seu pòsto: son davei contento perché a-o Confeugo do 2010 a Compagna a l'aiva domandòu de riscistemâla. Amiemo òua e cöse che no van.

L'ò za dito l'anno pasou: o pòsto dôve gh'èa a câza natale de Paganin e òua gh'è e doe lapidi o l'é de longo spòrco. Quande l'é che se riesciâ a fâ in bello netezzo con levâ e scrite che inciastran e miâge e dâ 'na spasâ li d'in gîo? E zaché parlo de Paganin, no pòsso no dî che st'anno chi o Premio Paganin o l'é sâtòu. Sciâ ne peu dâ a garançia che st'anno intrante o ghe saiâ pe 'n davei? E ch'ò mantegniâ a cadensa bienale?

Zêna a l'â tante cöse ma perché, diggo mi, quande se parla da "Sindone" no se parla mai do "Santo Mandillo" che de segûo o l'é do Milletrento? E quande se parla do Graal, no se çita mai o nostro "Sacro Catin", portòu a Zêna da l'Enbriaco do Milleçento? A-a televixon, àn parlòu da famiggia "Chigi" ch'a finansiava e potense de l'Eoropa. Ma chi a Zêna quæxi tutte e famigge, comme vosciâ sciâ sa meglio de mi, àn finansiòu a rêo rê e inperatoî! Ma nisciun dixè ninte. Pe no parlâ do presépio! Se a Napoli metan 'na figurinn-a qualonque, ne parla tutto o mondo, chi a Zêna gh'emmo di preséppi mâvegiòzi e a îsa a îsa ne parla i giornali çitadin (anche a Compagna insemme a-a Berio a



fa 'n presépio dove ogni anno se gh'azonze 'na figurinn-a, ma *tutto tace*). Semmo a patria de motociclette, ma da Guzzi, fondâ a Zêna, e da Piaggio, fondâ into comun de Sestri Ponente, no ne parla nisciun. Veuggio pure aregordâ che gh'emmo 'n archivio inportante, quello de l'antigo uspiâ de Pamaton, in tòcco de stòia de Zena, ch'ò no l'é valorizòu comme o meritieiva: bezorieiva trovâ o mòddo pe intervegnî 'na vòtta pe tutte.

Ecco, a niatri zeneixi da Compagna ne saieiva cào che se parlasse de ciù da stòia de Zena, da quella antiga a quella de vèi, quella stòia bella, inportante, ch'a l'â fæto vegnî Zêna bella e ricca. A niatri zeneixi ne saieiva cào che se parlasse de quello che gh'emmo, di nòstri tezoî, de spesso ascoxi, de cöse belle e gloriòze, da fâne sentî contenti, grandi e picin, de stâ e de vive inte questa nòstra çitæ. Anche perché, se sa, avei coscensa de quello che semmo o l'é o meglio mòddo pe acheugge chi vegne da niatri in çerca de fortun-a. Pe questo, sciò scindico, concluddo con l'afermâ che 'na cösa a l'é segûa: se o Comùn o vorîa intervegnî in sce questi temi a Compagna a l'é pronta a colaborâ, a dâse da fâ insemme a vosciâ e a tutta l'istituçion, pe portâ Zêna a l'ônò do mondo.

Tanti ouguri e scignorîa a Vosciâ e a tutti. Pe Zena e pe San Zorzo!

O scindico o l'â risposto a-a Maria Vietz con di gren sorizi e a l'Abòu con dî che i dinæ de l'Imu van speizi ben e che o seu inpegno o saiâ quello de garantî i serviççi a-i çitadin e de intevegnî pe-a valorizaçion de Zena e pe afrontâ e doe emergense da çitæ: a seguessa di sciummi e a mancansa de lòu. Mogognâ, a pai do Scindico, no serve: bezeugna dase da fâ comme fava i vegi zeneixi.

Doe oservaçioin veuggio fâ chi. Primmo: piggio notta che o Scindico o no l'â dito ninte, manco 'na parolla, in sciò premio Paganin (o se continoîa a fâ ò no?) e in scî 98 miliardi. Segundo: i mogogni da Compagna no son fæti solo pe parlâ. Son fæti pe dâ de ponziagne a l'aministraçion, e a bella soluçion pe-a statoa do De Ferrari a l'é a preuva ciù lanpante. Senza scordâ che A Compagna a l'é de longo pronta a da 'na man pe costruî 'na Zena meglio de sta chi. Alegri!

